

Dapli ecologia sin il sectur agrar

Politica agrara 2014–2017

DA LUCAS DEPLAZES / ANR

■ **Il cussegl naziunal ha deliberà ier la politica agrara 2014–2017. Ils meds finanzials da 13,67 milliardas francs duain vegnir impundids per indemnisar las prestaziuns dals purs, per proteger la cuntrada e per promover la competitividad dal puresser.** Cun la politica agrara 2014–2017 vul il cussegl federal promover l'innovaziun, la protecziun da la cuntrada e meglierar la competitividad dal puresser. Plinavant vul il cussegl federal sustegnair pli ferm las prestaziuns d'utilitad publica. Ils pajaments directs da var 11,2 milliardas francs vegnan mantegnids. Questas contribuziuns duain dentant vegnir impundidas cun cleras intenziuns. Empè da resguardar il dumber dals animals duai vegnir prendì en consideraziun la segirtad dal provediment da la populaziun cun agens products ed ils aspects per proteger la cuntrada. Cun sia politica agrara per ils proxim onns vul la regenza era prender en consideraziun las sfidas da nos temp sco la midada dal clima e la situaziun dal ferm franc svizzer.

Segirar il provediment e proteger la cuntrada

Sco quai ch'il pledader da la cumissiu Hansjörg Hassler (pbd/GR) ha punctuà surpiglia la cumissiu pli u main las propostas dal cussegl federal. Cun la politica agrara 2014–2017 duai vegnir mantegnì il provediment da la populaziun svizra sin il nivel actual da var 60%. La cumissiu sustegna era las finamiras da resguardar pli accentuadamain la cuntrada alpina e da mantegnair ina colonisaziun decentralisada cun contribuziuns per la biodiversitad e per l'alpeggiaziun. Hassler ha fatg attent ch'ils chantuns han er la pussaivladad da formular atgnas finamiras sin il sectur agrar. Per ils pajaments



Cun in magiel latg fa il pledader da la cumissiu Hansjörg Hassler (amez) printgas cun cusseglier federal Johann Schneider-Ammann (dretg) ed il parsura da la pcd Christoph Darbelley (san). KEYSTONE

directs èn reservads 2,8 milliardas francs l'onn. Cun 440 milliuns francs duai vegnir promovì la produziun e la vendita. 160 milliuns francs èn prevìs per mesiras socialas e per meglierar las cundiziuns da basa.

Cunter pradas da flurs

Toni Brunner (pps/SG) propona, en num da la pps, da refusar las propostas da cusseglier federal Johann Schneider-Ammann. Schneider-Ammann veglia avrir ils cunfins per l'import da chorn e da latg sin donn e cust da l'atgna produziun. La pps vul ina politica agrara che metta la produziun agrara ed il provediment da la populaziun en il center. Ella refusa la politica dals ecologists che vesan mo pradas cun fluras. La repartiziun dals pajaments directs proponida dal cussegl federal tschen-tia accents fallads.

Divers pledaders han fatg attent a la surproduziun da latg dapi la dismesa dals contingents, quai muntia ina catastrofa per ils purs. Il pretsch dal latg è sa reduci actualmain sin 50 raps il liter, pia sin il medem nivel sco 1967. Il cussegl naziunal ha dentant refusà da prender mesiras concretas per restrenscher la produziun da latg.

Meglierar la situaziun dals purs da muntogna

Cusseglier federal Johann Schneider-Ammann ha fatg attent a la gronda muntada dal puresser per segirar il provediment da la populaziun e per mantegnair la cuntrada. Ina cuntrada intacta è en l'interess da noss turissem. En ils 60 000 manaschis purils chattan 170 000 persunas occupaziun e gudogn. La tgira da la cuntrada tras la lavur da noss purs furma

il bun maletg da la Svizra, gea munta la noda-chasa da noss pajais, ha punctuà Schneider-Ammann. Cun las mesiras da la politica agrara 2014–2017 vul il cussegl federal meglierar la situaziun da la populaziun da muntogna che saja en dischavantatg en cumparegliaziun cun la Bassa. Finamira dal cussegl federal saja da rinforzar la qualitad e da preparar l'agricultura per l'avertura da la fiera. Il turissem da cumpra sur noss cunfins muntia in cler signal. A lunga vista na po la Svizra betg evitar ina tscherta avertura dal martgà.

Cun 135 vuschs cunter 45 ha il cussegl naziunal decidì d'entrar en la materia e refusà propostas da returnar la fatschenta al cussegl federal. En la debatta da detagl sto il cussegl naziunal decider davart passa 60 propostas da minoritad u da singulas intervenziuns.